

Bibaki Babidi

Mukelenge Yesu wakamba ne, “Muntu yonso udi mumvue meyi anyi aa ne utu waatumikila neikale bu muena meji, wakibaka nzubu wandi pa mutu pa dibue, mvula yakaloka, misulu yakuula, bipupu biakalua, biakakuma ku nzubu, kadi nzubu kakupuka, bua yeye wakadi muibaka pa dibue. Muntu yonso udi mumvue meyi anyi aa, kayi waatumikila, udi biandi bu muntu mupote, wakibaka nzubu wandi pa lusenga; mvula yakaloka, misulu yakuula, bipupu biakalua, biakakuma ku nzubu, nzubu wakupuka; kupuka kuandi kuakadi kunene.” (Matayo 7:24-27)

Muena meji udi wasa ditabuja diandi pamutu pa bishimikidi bimpe

“Kakuena muntu udi mua kujadika bishimikidi bikuabo, anu biobo biakamana kujadikibua, bidi Yesu Kilisto mene. Nunku, bu munuakitabuja Kilisto Yesu Mukelenge, nuikale nuende mu Kilisto; nuikale ne miji yenu miedibue munda muandi, nuikale nuashibue munda muandi, ne nuikale nujadikibue mu ditabuja dienu, bu munuakayishibua; nukumbane mu disakidila.”

(1 Kolinto 3:11. Kolosai 2:6,7)

“Nuende bu bena meji; nudisumbile tshikondo patshiditshiku tshia kuenzamu malu mimpe, bualu bua matuku adi mabi.”

(Efeso 5:15,16)

“Bishimikidi bikole biakateka Nzambi bidi bijalama, bidi ne tshimanyishilu etshi ne, Mukelenge udi mumanye badi bandi; ne, Muntu yonso udi utela dina dia Mukelenge umuke biandi ku malu mabi.”

(2 Timote 2:19)

© C.E.R.S. - B.P. 1673 Kananga
République Démocratique Du Congo
Email: 33eme.cers.lit@gmail.com

<http://www.33eme-cers.org/>

Bamfumu Babidi



Bamfumu Babidi

Mukelenge Yesu wakamba ne, “Ndi mulami muimpe wa mikoko; mulami muimpe udi ufuila mikoko. Mikoko yanyi idi yunvua diyi diany, ndi muimanye, idi indonda; ndi nyipa muoyo wa tshiendelele; kayena ifua tshiendelele, kakuena mukuabo udi winyenga mu tshianza tshianyi.” (Yone 10:11,27,28)

Mfumu mubi

Satana udi mukokeshi wa buloba (Yone 14:30). Udi udinga bantu. “Bakafofomishabo mesu a meji a badi kabayi bitabuja kudi nzambi wa tshikondo etshi, bua dinkenka dia lumu luimpe lua butumbi bua Kilisto, udi tshifuanyikishi tshia Nzambi, kaditema kudibo.” (2 Kolinto 4:4)

Lelu usungule udi musue kukuatshila mudimu

“Muntu kena mumanye mua kukuatshila bamfumu babidi mudimu diakamue.” Yoshua wakambila Bena Isalele ne, “Binuamona ne kukuatshila Yehowa mudimu kudi kubi, lelu nusungule unudi basue kukuatshila mudimu, ne nzambi yakadi bankambua benu bakuatshile mudimu dishiya dia musulu wa Pelata ... kadi meme ne ba mu nzubu muanyi netukuatshile Yehowa mudimu.” (Matayo 6:24. Yoshua 24:15)

Dina diebe didi difunda mu Diulu, anyi?

“Disanka didi ku mesu kua banjelo ba Nzambi bualu bua muntu umue mubi wakukudimuna mutshima wandi.” Mukelenge Yesu wakambila bayidi bandi ne, “Nusanke bua mena enu adi mafunda mu diulu.” (Luka 15:10,10:20)

“Kakuena tshintu tshia tshianana tshidi tshibuelamu, nansha kakese; nansha muntu udi wenza bualu bubi ne mashimi; kadi anu badi ne mena abo mafunda mu mukanda wa muoyo wa Muana wa Mukoko nebabuelemu.” (Buakabuluibua 21:27)

Njila Ibidi

“Nubuele ku mushiku wa mbelu mubumbakane, bualu bua mushiku wa mbelu udi munene, ne njila wa kabutu udi munene, ne bantu ba bungi badi babuelamu. Mushiku wa mbelu udi mubumbakane, ne njila wa ku muoyo udi mubumbakane, ne bantu banya-banya badi bamumona.” (Matayo 7:13,14)

“Njila udiku udi mululame ku mesu kua muntu, kadi nshikidilu wandi udi lufu.” (Nsumuinu 16:25)

Tuakupambuka bu mikoko

“Buonso buetu tuakupambuka bu mikoko, tuakukudimuka bua kuya muntu wandi njila muntu wandi njila. Yehowa wakuteka dipila dia bubi bua buonso buetu pambidi pandi [pa Yesu].” (Yeshaya 53:6)

“Muntu mubi alekele kuenda mu njila wandi mubi, udi kayi muakane alekele meji andi mabi; apingane biandi kudi Yehowa, yeye neamufuile luse; ne kudi Nzambi wetu, bualu bua yeye neatambe kumubuikidila mibi yandi.” (Yeshaya 55:7)

Mukelenge Yesu nkayandi udi njila

Pakadi Mukelenge Yesu pepi bua kushiya bayidi bandi ne kuya ku mutshi mutshiamakane ne lufu, yeye wakabambila ne, “Mitshima yenu kayizakadi; nuitabuje Nzambi, nungitabuje meme kabidi. Nudi bamanye njila wa kundi nya. Toma wakamukonka ne, Mukelenge, katuena bamanye kuwaya, tudi bamanye njila kudi kunyi? Yesu wakamuambila ne, Meme ndi bianyi njila ne bulelela ne muoyo, kakuena muntu udi ulua kudi Tatu, kayi muanze kulua kundi diambedi.” (Yone 14:1,4-6)

Mu munga muntu yonso kamuena lupandu, bualu bua kakuena dina muinshi mua diulu, dipa bantu, didi dimanye mua kutusungila.” (Bienzedi 4:12)